

НА ЛИТИИ СТИХИРЫ ПРАЗДНИКА, ГЛАС 1:

Не́бо и земля днесь пророчески да возвеселя́тся,/ Ангели и человецы духовно да торжествуют,/ я́ко Бог во плоти яви́ся/ сущим во тьме и сѣни седя́щим,/ рождѣ́йся от Дѣвы;/ вертеп и ясли прия́ша Того́;/ па́стырие чудо проповѣ́дуют;/ волсви от восток в Вифлеем да́ры прино́сят./ Мы́ же хвалу недостойными устнами ангельски Тому́ принесѣ́м:/ слава в Вышних Богу, и на землі́ мі́р,/ при́иде бо Чаяние язы́ков,// пришед, спасе нас от работы вра́жия.

Небо и земля днесь совокупишася,/ рождшуся Христу./ Днесь Бог на землю прииде,/ и человек на Небеса взыде./ Днесь видимь есть плотию,/ естеством невидимый, человека ради./ Сего ради и мы, славословяще, возопиим Ему:/ Слава в Вышних Богу, и на земли мир,/ дарова бо пришествие Твое,// Спасе наш, слава Тебе.

Слава в Вышних Богу,/ в Вифлееме слышу от Безплотных днесь,/ на земли мир благоволившему быти./ Ныне Дева Небес ширши:/ возсия бо свет омраченным/ и смиренныя возвыси, ангельски поющия:// слава в Вышних Богу.

По образу и по подобию, истлевша преступлением/ видеv, Иисус, приклонив Небеса, сниде/ и вселися во утробу девственную неизменно,/ да в ней истлевшаго Адама обновит, зовуща:// слава явлению Твоему, Избавителю мой и Боже.

Слава, глас 5:

Волсви, персидстии царие,/ познавше яве на земли рождшагося Царя Небеснаго,/ от светлыя звезды водими,/ достигоша в Вифлеем, дары носяще избранныя,/ золото, и ливан, и смирну,/ и, падше, поклонишася:// видеша бо в вертепе Младенца лежаща безлетнаго.

И ныне, глас 6:

Ликуют Ангели вси на Небеси,/ и радуются человецы днесь,/ играет же вся тварь рождшагося ради в Вифлееме Спаса Господа,/ яко всякая лествь идольская преста,// и царствует Христос во веки.